

四庫全書

集部

欽定四庫全書

集部

明文海卷三百二十九

詳校官編修臣潘庭筠

主事銜臣徐以坤覆勘

總校官庶吉士臣倉聖脉

校對官中書臣王家賓

謄錄監生臣朱學濂

欽定四庫全書

明文海卷三百十九

餘姚黃宗義編

序一百十

壽序

賀葉孟純壽八十序

楊守陳

吳庠生葉伯瑄來京師就余學去其鄉四千餘里而安處豐食無羈旅之態者蓋有族叔祖孟純翁為其倚也既而伯瑄之叔父志宏來謁自言以鄉選入國學恒依

翁家居十數載翁念敦叙之誼久而不衰余心識之去
年冬伯瑄之尊人自吳至即翁家為具招余余因太常
少卿劉叔溫工科給事中姚景昭督府經歷朱道隆應
其招騎出崇文門外數百步轉而東三里所有樓翼然
下臨閭闔者翁之家也登樓少選翁出揖客華顛龐眉
服疏布寬博之服蕭然有林下風度坐而問之乃曰老
夫自永樂初徙居於茲時地寒人鮮土產甚稀居者率
皆茅簷荆扉土牀陶釜一切生活之計甚薄故亦寡求

而易足自後數十年四方之人物雲萃居者如櫛其屋
皆覆以瓦而朱綠其棟楹牕戶無昔之茅簷荆扉者矣
其器皆用髹漆金銀象玉有若昔之土床陶釜者鮮矣
與凡衣食百用之需矜奢鬪靡視昔奚啻百之蓋列
聖覆露煦噓休養之澤既深且久故至於此可謂太平
全盛之世矣然人侈用而不知節貪求而不知止徃徃
因以累其生是可歎者而吾緼袍蔬食無改於初屋室
器四百用不甚侈於舊視彼差若愈之始與吾居富且

貴幾人少且壯若干人今皆無在者矣而吾幸久生獨存齒已七十有九矣其言質而有理余四人者皆嘉歎之已而獻酬禮畢別翁以歸至今年翁已八十搢紳有為詩以賀之者伯理請余為序乃為書余所見聞者如此引伸觸類則翁之所以享高壽者豈偶然之故哉

姜翁夫婦八十序

李夢陽

人有言曰富壽康寧然論者必歸諸三王之世非謂其太和雍熙無愁苦夭折之民耶雖然八十者於其時亦

罕矣故其制曰八十拜君命一坐再至又曰八十曰耄
此非謂其筋力智慮衰耶是故有罪不刑食則常珍於
朝則杖夫使八十者誠易得也古之人豈宜優禮若此
哉然此亦謂其耄者耳非夫婦偕也假如八十而夫婦
偕又弗耄也若今長安姜翁者古之人又若何而優禮
焉嗚呼亦罕矣余讀載記上下數千年間夫婦齊德而
隱者吾獲三人焉冀缺梁鴻龐公是已然三人者史皆
不著其年設其年與姜翁比然未必皆弗耄也即弗耄

矣未必與其婦偕也嗚呼若姜翁者不誠罕邪不誠罕
邪且壽者氣昌而娛樂者之為也今天下民窮而歛急
輸不息肩徵弗停催亦甚矣姜翁顧奚所娛於心而使
其氣昌也余竊嘗觀翁夫婦矣並生於宣德初年是太
和雍熙之際也一宜壽齊德而隱二宜壽所謂裁者培
之也其子判名郡能不辱其身養志率訓珍綺備矣
三宜壽夫三者一係之天二係之人是氣之機而娛之
要也故曰得機者昌知要者康夫若是乃其壽焉得而

不偕也又安所得耄矣余往年道秦晉之境見山谷田
野間多龐眉皓髮之民乃其年故不亞姜翁然徵輸比
急愁歎病貧相與轉而之溝壑者殆半矣幸而存美氣
昌而娛樂者幾焉於乎亦罕矣余於姜翁夫婦有深慕
焉有深敬焉又有深感焉作斯序

學古劉先生壽詩序

羅玘

學古劉先生吾始不知其何如人或曰敬齋之子也敬
齋之潔已近世來一人而已其判金華時體無完衣而寒之

劇也温足以斲焚蒿加手於其上至不可忍則貧民之
羸烏以行歷數置而霽裘而識之邇以昇其民而其守
雄也輒與過閹相抗至閹怒而互搏無少遜閹以聞逮
至闕皇帝赫然南面清問之逆鱗之下無爽其初而亦
自是不復歸鄉井先是母喪不能舉女之不能歸者三
人身後有遺悲矣賴先生勤身節縮授徒取直日就補
苴而喪之葬妹之歸田廬之可生者亦既鞠育矣今鄉
進士御史君二人者疑疑然以長也而又自能起名鄉

書教武昌武進有成擢至翰林孔目年未六十而歸又
二十年乃以御史之貴為封君與王孺人偕榮於燕閒
歸宿之境明年年八十矣尚無恙也日猶課諸孫以燕
翼劉氏於無窮嗚呼敬齋之盛盛矣然於劉氏若無預
也而劉氏徵先生將不為編氓乎不可得也御史同予
丁未進士入翰林為庶吉士先生自家以十詠抵御史
屬予和予覽其體裁類杜甚愛之又聞其深自秘重不
輕以畀人意氣嚴毅不減父風其不蹈父之軌者蓋其

所遭之時不同而然邪抑亦天之所以福劉氏也劉世
藉安成湖之最西境於京師為僻遠先生未封時御史
按雲南嘗一便省之茲而再閱數月是為明年暮春之
初又御史思歸省慶時也先生雪髮繡衣晚榮而壽御
史歸乎樂也然其自所抱負終身局於支撐劉宗若斲
而小之今已無及矣誰無追惟而鬱鬱者則其所倚重
於御史獨飽於其一歸而已邪予知御史最深故不避
而發此序之以為先生壽言而不文則珠璣爛然以掩

我亦固非以文為競也

汪君七十壽序

羅玘

歛之老汪敦實九月二十五日七十壽予始不知之也
武選黃君曰吾歛令人也越公之胄於是為最其始也
萍梗之迹半天下而其采拾也無險無艱若沒人之入
於淵泉無所底止而其既獲也若裒金之復於冶鐘鼎
之器由是成焉今老矣若碇之棲於岸而以子文昭嗣
為之若舟也季子文暉繼焉亦若舟也謹緋維之無不

如志於是而食歛素封若實封然雖然不以厲人驕人
而以利人吾孔慕焉然茲去歛三千里也敢割藉乎而
歸為之壽乎抑二子也其亦無俟吾之歸而惟俟吾言
之歸噫吾言奚足取也吾幼見吾室之覆瓿者矣取視
之鄉先生之文半焉又見吾室之棄帙矣鼠餘也或風
雨之所蝕也取視之以質吾長老焉則盡近世之名能
文者也以其無為吾之重輕故棄之或曰以其非若古
賢人之作也故棄之以吾室之棄之也如汪氏之將棄

吾也奈何以其今日之取吾也而取其它日之棄吾乎
予曰嘻世豈有盡棄者乎歛新安郡也不見篁墩之志
乎固有可棄而未棄者也黃君曰篁墩恕然則予為試
序之安知後不有恕如篁墩者邪則予文與敦實之名
固將壽於天地間不獨今日之壽而已其可尚也黃君
喜曰然黃君嘗宰吾金谿有舊愛而喜為之役云

陳勁齋六十序

羅紀

分寧縣學入國朝幾兩圮發帑金新之皆陳氏而勁齋

翁嗣為之縣之民罹飢年亦不知其幾矣發廩捐金賑之多陳氏翁又嗣之縣語孝友行誼稱鄉先生可俎豆於社者亦多陳氏人今又皆仰翁焉兩造幾發陳之先為之落機牙而寢者無算也翁尤駉駉然若剖竹破節無留鋒芒今雖六十也其應尚無倦縣庭掃除甚適也故縣人皆曰此翁勁名之曰勁齋翁吾未深識翁方伯周公為駕部時道之公之弟刑部君朝夕與吾居又極道之翁之從子介吾昔與之識省下亦嘗譽其仲父勁

齋者吾時猶駭甚不意其果若此也夫人持一瓣香入
寺門其口之析其心之望吾不知其何如也富者供佛
以宮以為佛能錫以福也飯僧以田以為僧與佛居能
使佛福我也天下之不能禍且福至於吾孔氏之徒亦
極矣而陳氏世為學以居之至於嗷嗷待哺之民其於
身之弗能恤況於所謂禍且福者而陳氏世賑之畢竟
與世之人背而馳也何求哉豈其世愚而莫之覺邪又
吾嘗見世之為富者矣鄉隣之詈者使之鬪也鬪者使

之訟也訟者使之貨也然後左右觀望乘其急而市其田宅以自廣焉而陳氏又世為之寢皆世俗指為愚者然而陳之富日以益它縣莫不聞陳之被冠服比貴人者森若壽考稱鄉先生者亦踵出若翁是也詩曰求福不回世人蓋未之思耳陳氏為近之然吾獨以頌翁者歲二月壬申翁壽在是泝來徵為序以賀也

賀湛翁九十一序

王漸逵

吾廣之山自崑崙而東而南而盡於南海其東為五嶺

又其東為羅浮其水盡五嶺之南西溯牂牁又其西合
滇南潯梧之水而會於峽山其東為軒轅之洲虎頭之
門潮惠之流歸焉是祝融之會墟文明之隩宅也重嶂
巨浸甲於天下靈秘瑰竒克沃播盪物怪神奸不足以
當之時復鍾而為人故名世豪傑之士間生於其中大
鑿師惠皆新州人也以不識字之夫崛起遐荒受法黃
梅降壓夫八百之僧奪其衣鉢以歸非豪傑之士其能
之乎甘泉先生增城人也以一介之儒北過燕趙屈天

下之士而魁之居司城之位為四方之師非豪傑之士
其能之乎方大鑒之南歸也神秀演法於雙林號為北
宗大鑒卓錫於南華號為南宗然而雙林之傳日泯而
曹溪之派獨行至今天下翕然信之禪慧普照光於震
旦斯則大鑒之道盛也方甘泉先生之在燕京也與王
陽明講聖賢之學溯周程之脉一洗時俗而更張之於
是天下之學者始識性命之懿靡然以從故陽明之派
曰浙宗先生之派曰廣宗然而陽明早世而先生獨以

高壽作人後之學者慕先生之風莫不遠自四方裹糧
而來得以及門為幸斯則先生之道盛也夫大鑿先生
皆吾廣人其山川之所孕毓固不負於靈異之鍾而二
公之所建立亦可為不負於山川之所產出者矣雖其
門戶各入儒釋殊機其為名世豪傑之士也今夫太山
喬岳雖莫立各異而其為人之瞻仰則同焉珊瑚琅玕
雖瑞寶各異而其為人之珍愛則均焉夏之鼎商之彝
人將以不世出之古物視之而尚論其他乎先生於是

月小陽之春十有三日為九十一降誕之辰吾廣之大
夫士及諸門生皆慶先生之重於吾廣之得先生為賀
逵先生通家子也又得日承謦欬幸莫大焉昔孟子以
弗得親孔子為憾陳瑩中以弗識程明道為憾逵之遇
方自慶且幸固無復所為憾也已則吾於先生之壽其
能已於祝

壽丁君仕玉七十序

夏良勝

山谷之民壽城市之民夭非其受氣爾殊也山谷之俗

野野則樸樸則不鑿生氣日完而壽然未必皆壽而壽者恒多於天城市之俗澆澆則離離則浸薄生氣日索而天亦未必皆大而天者亦恒多於壽今予所見則又異是京師天下之城市也丁君仕玉居之其伯也仕隆享年七十有奇仲也仕元享年八十仕玉今又七十而貌也腴步也捷鬚髮澤膩雙瞳碧光炯炯頤和如實強健欲下壯夫而伏之見者識者咸背指面卜以成數之壽其及也嗚呼丁氏居京師獨非城市民乎而兄弟克

享有壽子固知其非城市民也丁氏吾南城人其故廬
在水南南城南條之盡脉天下之山谷也水南又南城
之山谷也巖岬岑巖原野夷曠湍瀑廉利林居土屋之
下童叟循循垢面跣行尚有不能通越境人言者仕玉
兄弟或生於斯或長於斯亦嘗耕於斯採於斯餽粥於
斯友族屬於斯連姻婭於斯雖伍寓京師數十年而以
雄貨商販不絕道路無三歲不展廬焉父母死亦歸葬
焉子女之好尚求鄉人焉而鄉大夫宦游京師者招致

而主焉仕玉又往來燕冀齊魯吳越以及交廣閩粵之
幽竒勝絕皆致遊思焉其心未嘗不在山谷也可以城
市之居累之哉是故有仕玉之心焉往而不壽也不然
吾南城之民固有天者矣京師寧無壽民已乎固知有
山谷之心無山谷之民有城市之心無城市之民若壽
與夭初不限於所居居亦移其氣也仕玉且老有定力
矣保無移也哉

壽座主李龍洲先生序 胡直

今之主司操較士之權其欲為古之得人也其亦以難矣雖然尤莫難於有得人心古者鄉老鄉大夫以所知賢能薦於王漢晉舉賢良孝廉唯恐非知名士故當時得人稱盛至唐獨取文藝反糊其名氏扶裂其字號唯恐一知其名苟知則與之罪而不敢辭方其較藝也又獨取中有司之尺度一累黍不中則雖有希奇命世之才亦斥之矣何則希奇命世之才必不敢瑣瑣然就有司之尺度彼有司者方自挾其尺度而欲求希奇

於名氏字號之外是猶掩鏡以求明也不可幾矣終唐
之世唯陸贄取士冠當時贄固能先知其良而不尺度
求也後之主司非不欲先知要不敢以身試於罪僂其
事公也其心私也為贄之徒欲為國祈得人不敢避先
知之罪其事私也其心公也然贄當時幸免於罪今也
必不免於罪是故有贄之心則誠難矣嘉靖癸卯荆之
龍洲李公以名御史監江西試事獨畧去尺度兼收剗
剗虛衷信人不以己專故良藩臬才郡邑間得以知名

士進是歲所薦士果稱得人而公竟不免謫去公曰苟誠得人吾罪宜也而癸卯士登甲乙科躋歷崇顯宏猷循政與學貞行番番然列中外者獨衆當路始追誦公功起為蜀臬僉以歸而年且七十矣直在羣士中最晚出時方被命佐楚臬羣士仕京師者顧謂某曰子行為吾黨致觴祝祝辭子善為之某曰若公則可與致辭矣今人以身名為寶其澤不流則名為虛副而身終無見重之端公之監江西也曾不恤乎身之被罪毅然以得人

為己任斯其心非一人之心固天下人之心也公既晚
起未究厥施使及門士果皆出其所學上以報朝廷下
以報知己攄猷彈志聲應氣求以公之澤施及世世斯
其功德非一人之功德固百世之功德也古今之共艷
修齡其孰有如此者某以此壽可乎已而某至楚道荆
謁公時年七十又三某因致諸君之命奉觴避席輸前
之辭介幣以晉公喜而興曰吾數十年之心藏於中而
不欲告人者子一旦暴之吾可以樂而忘老矣某於是

書而叙之且以復諸君曰唯公所自壽者其思深其旨
遠矣乃若攄猷殫志聲應氣求將其濺澤以壽公於百
世者其不在吾黨乎其不在吾黨乎

壽襄王序

張居正

今祝人主壽者曰萬歲祝侯王曰千歲其說何自昉乎
夫人壽之不可幾以萬千歲稔矣而祝者致其愛敬之
忱一若理固有之不可以常數計則世主侯王之與衆庶
異也夫物有便於已則願其長有之無便於已即一日

不能相守日之中天也有目者待以眎有足者待以行
雞三號延頸企踵東面而晞無不願萬年有日者非愛
之也特賴焉故也五岳四瀆之居於方隅也興雲雨胎
寶藏以給人之求人莫不禱祀而求福焉利在焉故也
人主者日也侯王者岳瀆也人主兼利天下天下莫不
願以為君侯王澤逮一國一國無不願以為君故人主
萬歲則天下之人以萬歲蒙其利矣侯王千歲則一國
之人以千歲蒙其利矣故世之祝人主侯王者莫不願

其千秋萬歲何者便於己故也非然者且為厲為孽將
誹讟之是承何千萬之有襄之建國百年矣世濟其德
以屏翊帝室至今王益有聲江漢間居正自家食時聞
王之賢未見也及過襄陽竊從下風望見顏色王天下
之賢王也夫賢者使人愛而戴之便而安之居正竊聞
太守汪大夫言言王雖處崇鉅其自約結恒如處子士
大夫過封內者無論知不知必降接禮遇下客已甚其
惠民也渥而馭左右也甚嚴事涉有司即有司人百曲

不罪也左右雖百直猶不貸務在屈己檢下以伸有司之法故自太守以下至於編戶之民咸曰王有大惠於襄之吏民吏民靡有秋毫可以報塞者獨願王千歲有國以重惠襄之人此之為德不特一手一足便之而已夫淵深而魚聚之林鬱而鳥獸歸焉詩曰投我以桃報之以李王所以投於襄之吏民者厚矣非壽考祈福將安用報乎雖然竊有願焉王亦知夫敖氏之積粟者乎周人有敖氏者積粟盈困足支數十年未足也而問貯

積於嗇夫嗇夫曰子之積厚矣吾無以益子子而計子
之所有者慎用之而已夫圭撮之不慎鐘筥洩之鐘筥
之不慎尾閭洩之江海雖大也以奉漏卮則沒世不能
取盈焉我嗇夫也吾告之以嗇而已夫神不可以騫用
嗇之則凝福不可以驟享嗇之則水疆不可以厚恃嗇
之則堅故聖人之言曰事天治人莫如嗇王今年三十
春秋矣計三十於千歲也不猶積貯盈困而始去其圭
撮者乎王誠能少垂意於嗇夫之論無輕用其年力之

富以顯神而思永則所謂千歲云者猶近言之也六月八日為王誕辰汪大夫走入京師使居正為祝詞焉居正荆人也荆之去襄僅數百里楚山漢水庇潤者廣矣茲其所以願之者豈異於襄之人

為孝廉顧道通追壽父母序

王世貞

凡人之情不假飾而發於性賢者恒任其過而不肖者恒任其不及自先王之禮教行不及者恒苦其勉企而過者恒苦於抑而不得伸然是先王之禮教雖本於裁

成而就中而其意若在伸而不在抑故夫人子之事親
生則致其養病則致其治歿則致其哀以為是無以加
矣養而不已而至於鬻子治而不已而至於割股哀而
不已而至於廬墓先王猶以為近於厚也而旌之鬻子
而無後割股而傷生廬墓而終身至犯於生人之大訓
然先王猶以為過而不以為罪陳於陵之不食其母許
世子之不嘗藥原壤之歌而宰予之欲短喪彼固幸而
免於一時之法然聖賢之所以挾其微而刑之萬世者

何嚴也故夫律此而語彼而人子之於親寧任其過可也友人孝廉顧道通一日冠裳而謁予再拜肅容而有請曰吾二親之棄不肖也賓在壯先子北山篤行君子顧其名施遠不能出里閭母何淑懿令人其教近不能出檐闥而是時不肖方稚不敢以微鉅公長者而為之銘若表蓋三十年如一日也計吾父母而在今歲當七十吾父母而七十不肖誠貧則必謁四方之醴齊醑盎以實吾觴則必謁四方之散載羶鄉以實吾俎則必謁四

方之賢士大夫歌頌序記以實吾堂而今悉已矣其所
致而實觴俎者度無以起吾父而薦之而至於歌頌序
記其文義之雋足以時寄吾思其美而傳足以噓枯而
肉骨而使之不朽即先生其人不肖願有請於先生
予怪而語之夫所謂壽者黃耆台背玄髮兒齒之年而
所以壽之者崇岡茂陵川升日至之語今舉堂上之祝而
致之冢中之陳毋乃非當乎道通拜不已曰先生義正
吾無以奪先生雖然其必有以慰吾逝者於地下而寓

吾思余固謝不許道通之友曹生從旁說曰吾吳之俗
薄者懸弧之宴子輒避亡肉脯酒漿責直以償易簣而
呼去檢橐裝送葬之子哭徃笑歸墓木如拱博進是資
孰與顧君之老而慕其父母乎即厚者多作佛事號為
冥施浮屠黃冠是依是師斥其貝璣以馳京師構銜而
旋冠其豐碑孰與顧君之知乞先生文以寄其慕者乎
曹生之說云爾嗟夫顧君之所為請誠不經而吾之許
誠濫顧有感於曹生之說似猶得夫先王之所厚而竊

附於鬻子割股而廬墓者因為序而歸之

壽羅達夫序 趙時春

羅氏自豫章先生以來世有聞人而吉水之族近世得一峯先生而益著一峯之澤未泯得吾友念庵羅君達夫而又著吉水自文相信公以迄今冠廷對者得十人天下甲科之盛莫先焉而公議獨重兩羅一峯既以完節終歸於孔氏之域天下無二論獨達夫年已六十其所持者益堅內自養者益光大其與一峰相始終以

無愧前聞蓋無可疑議世俗之禮舉不足以壽達夫而
其有大可畏者唯在於惑世俗之禮焉雖然吾達夫其
可以俗禮惑然朋友之義主於輔仁而貴忠信忠信所
以進於仁也仁者天之道人之心也自宋儒以來世守
其說自以為越跨漢唐由今觀之今不及宋宋不及唐
唐不及漢漢固無望於三代矣豈後之才異於古哉忠
信日薄故也中人之情要近利而急取名名利之趨捐
軀以赴之自發義帝喪捐金六萬以及今日凡其奔走

羣動賁藻汗簡者自獨行忠節隱逸之外無非是焉蓋以是物而待是人則固有然矣而何疑於忠信之薄哉其來固久遠矣蓋老氏遂厭絕之而孔子惟以忠信為仁為教其最高弟子勇如仲路智如端木貢謀如宰予皆以過咎顯責毋諱挫礪備至迄用有成忠信故也後之君子寧復有是事哉日相導諛為偽故虛名多而實效寡雖有忠信之士互相哂訕牢固前涂又豈不大可畏哉相違二十餘年度吾達夫天子忠厚可望而知後復

有二十餘年乎守忠不渝光大變化非予之所能懸度也而有厚望焉其端則在於忠信然此豈余之私言也哉述孔氏之言也因歸於孔氏達夫與余之所以交也願終老而卒業焉

明文海卷三百十九

欽定四庫全書

明文海卷三百二十

餘姚黃宗義編

序一百十一

壽序

張曾庵七十序

歸有光

世之論人壽以百年為限然脩短之數得之於天不可
以齊得數之長者百歲為老矣彭祖之百歲豈非其嬰
稚之時耶得數之短者歲月為稚矣殤子之歲月豈非

其垂老之時邪予畸窮於世故常居閭里間從鄉先生長者遊自少識張曾庵先生白晢豐頤美鬚髯蓋先生是時年已五十容甚少也又十年先生六十其氣完其容無異於初見之時不知十年之加也今年先生七十亦無耆老之色其美鬚髯髮漆黑自若也先生未嘗知世所謂服食煉形之法而得數之長如此則今之七十者其亦猶嬰稚之時邪吾吳中之俗尤重生辰自五十以上當其生辰即為壽前年先生猶為博士弟子激昂

踔厲諸少年莫敢推其鋒雖諸少年亦以為先生少故
無為先生壽者今先生忽自謝其博士而老於家其高
第弟子乃往為先生壽壽已則相與求予之一言以序
其事噫子之先生未可以壽也子之先生讀聖人之書
自以為得其蘊每酒酣輒為人說書意掀髯指畫左右
顧視傍若無人當世宿學莫能難也與人交洞見底裏
規人之過至於泣下豈非所謂直道君子者哉往予至
京師見有衣玉帶乘白馬黃金絡前後呵擁者其人白

哲豐頤美鬚髯儼然子之先生也而歎曰何其類吾鄉之張子也張子六舉於鄉而今猶布褐而趨於博士之庭雖然今十年矣其人不知果安在而子之先生所自得者何如也吾又安能舍子之先生而羨彼為哉皆曰善請遂書之繼自今歲為先生壽必誦子之言矣

魏濬甫五十序

歸有光

余始為魏氏諸倩而濬甫年小於予時尚垂髫見余握手甚親及濬甫自真義遊學城中時時來過其女兄即

留飲相歡也當是時恭簡公家居講道四方學者多聚
星溪之上公於其家子弟尤所屬意而吾舅光祿公闢
家塾延致名儒濬甫遵矩矱無所失而於進士之業皆
能工習濬甫升太學一再試秋闈見罷遂不復往而獨
顯教其子今二子學皆已成庶幾可以紹恭簡公之業
濬甫年未至而輒已余嘗歎惜之明年為嘉靖四十一
年濬甫年五十以正月二日為初度之辰其子壻沈堯
俞以余計偕北上先期請余文為壽至期張設之蓋以

余最親又知之深也然余見濬甫之少又見其子之成立又老而為壽而吾舅姑與濬甫之女兄已隔異世則余之所感多矣度濬甫華堂燕坐子倩奉觴賓朋襍沓笙歌滿耳則余方孤舟栖泊於江淮之間自此蒙霧露凌霜雪又三千里持空然無有之軀欲以獻吾君豈不愧濬甫而欲為濬甫可得邪古者五十曰艾服官政又十年始爵命為大夫則士之效用於世任天下之事者適濬甫之年而濬甫苟自安逸非恭簡公之教漢李固

薦樊英黃瓊云一日朝會見諸侍中並年少無一宿儒
可備顧問則老成之人實國家之所須重年少而忽耆
老豈世道之福邪余以是惜濬甫之自止而又以歎余
之無所用而不知止也是為序

陸思軒壽序

歸有光

予友季子昇與陸君思軒同學相善君於是年六十子
昇屬予為文壽之東吳之俗號為淫侈然於養生之禮
未能具也獨隆於為壽人自五十以上每旬而加必於

其誕之辰召其鄉里親戚為盛會又有壽之文多至數十首張之壁間而來會者飲酒而已亦少睇其壁間之文故文不必其佳凡橫目二足之徒皆可為也予居是邑亦若列禦寇之在鄭之鄙衆庶而已故凡來求文為壽者常不拒逆其意以與之並馳於橫目二足之徒之間亦以見予之潦倒也雖然子昇之為陸君豈泛而求之予亦豈泛而應之邪陸君居縣之華翔村往年太僕桐城趙子舉采岷山嘗至其地見其土田肥美江流環

繞問知予家舊業而後失之子舉力勸予復其故而未能也蓋吳淞江水灌溉之利爲大華翔居江之要家置新江驛於此新江即吳淞江古所謂婁江也雖然同學而異造同賈而異售同工而異巧同稼而異穫將存其人耳君居華翔獨以善穡稱歲不失其公家之奉而以其贏自給雖當師旅飢饉之年而寬然其有餘古所謂孝弟力田者也所謂善良敦朴者也所謂周於利凶年不能害者也子昇其以是取之與先是君之子豫卿謁

選京師求嚴學士敏卿之文以為壽煌煌乎玉堂金馬
之制作鄉里有榮焉然嚴公之文所聞異辭欲道君之
實者宜有待於予言矣雖然予視君之貌尚少也則君
今之為壽太早子昇之請亦太早姑以是倍之為百二
十於是子昇來屬予文予可無辭而予與子昇陸君相
與嘯歌田里以效華封人之祝

壽蔡鶴峰序

王慎中

年之所以貴於人者何哉為其得以彌所受之性進修

之功日有底以考見不病於年數之不足而無以自克也蓋孔子欲加五十以學易苟不至於五十則未得以無過矣蘧伯玉行年六十而化苟不至於六十則不至於化矣常存其身而功得以常用故尺寸之陰如珍萬鎰之璧而為君子之所以貴年者也而人之所以貴君子之年者亦以此故五十而無大過孔子之五十也六十而化蘧伯玉之六十也別聲被色分味辨臭以盡耳目口鼻之能而充天地所委之形不忤於志而浩然有

以塞於兩間名之曰君子之年而晝夜日月之所見伏
寒暑四時之所來往載之於躬曉然其若昏旦之作息
動靜之舒慘年數彌高而益以為可貴蓋道德不一學
問不明之後人之能永年以厚生者常不絕於世而不
出於學問以進其道德則亦無可貴之年故眉龐顛白
隕然其脩齡者徒可以享子弟之養而不足以為朋友
之嚴事勤服於是稱壽致祝僅為家人父子閭里孝愛
之末儀而無所用之於道德問學交為愛敬之際其可

以有感也夫吾所為文以壽者龍溪蔡鶴峰先生友朋之所嚴事勤服唯恐不得為其子弟而聲慕氣接於千里之外猶知講承懋勉以自奮於下風蓋先生之學粹然一出於道其學既明其德既成而年亦已高矣所謂充其天地之形而稱其為君子之年先生蓋庶幾焉是歲十月八日為先生誕辰蓋年七十有一矣門人弟子與夫交遊慕接之在於聲氣之餘者舉以為先生祝而慎中尤奮在下風思為弟子而不可得也故獨見於文

蓋君子之自貴其年者為其加以年數則可以化可以無過學者之得事是君子也由其無過則可以內省其非也由其能化則可以思齊其益也故樂是人之長有年也而願之非徒知貴之焉而已爾故慎中為此文以道諸君之意而致祝於先生蓋異乎閭里子弟姻賓之為鄉之長者壽此所謂交為愛敬之行於道德學問之間者也先生其尚益自貴焉而又為友朋之所嚴事祇服也哉

壽了凡先生七十序

馮夢禎

今天下疇不知了凡先生哉先生窮年兀兀手一編研
討不休自青齡至皓首無他嗜好人有問者倒囊引繩
必令心開意解手足舞蹈而後已故載酒問字者屨滿
戶外則伊吾之士知有先生先生自少留心用世凡兵
戎水利安危大計考古証今逢人則問有得則記嘗見
先生掌大赫蹠積之囊箱者無算咨詢偶及抽檢指畫
懸河不窮故挾策請纓者趾錯庭下則經濟之士知有

先生先生於九流諸家無所不窺尤邃於醫即點化黃
白枕中石函之秘世儒所云捕風捉影不可希冀萬分
之一者而先生以為必有即試之而敗不校故挾數負術
者入幕頗多則方外之士知有先生先生早習洙泗晚
歸竺乾惟是三藏顯密之旨五宗棒喝之秘一一精探
之禪觀持誦日有定課雖服官臨民百冗交集未嘗廢
也雖稻麻竹葦世所指目以為禿民投刺即入未嘗忽
也故巢林八屨者分坐頗衆則緇黃之士知有先生然

此猶方內耳先生嘗乘傳佐兵事於朝鮮韜略信義為所服雖中道罷歸其功不顯而至今故部曲猶能疊疊談之即中山之國亦知有先生所慨天下皆知有先生而先生仁心惠政僅試於寶坻一邑而已徒以搢紳大夫間有不齊之口先生竟以此窮於遇儒稱定命佛語宿緣先生且奈之何哉然能窮先生於時不能窮先生於道著書豎義為後學所宗蓋天將嗇其用以就無用之用則不用於人而用於天疇謂先生不大用哉先生

家不富而喜施飯僧居其七而族屬親友居其三先生
曰飯僧以續佛慧命吾故急焉或謂是不當後族屬親
友耶先生不知也今年先生春秋滿七十矣而十二月
之十一日其懸弧之辰也余自庚午附籍先生三十餘
年受教為多余初未盡許竺乾氏醢雞之覆先生實發
之袖中一瓣香宜為先生祝願以歲暮不及稱觴幸因
先生族子熙祚輩遠來乞文遂叙其終始以請正於四
方之來者

壽李孟誠年丈七袞序

許子遠

憶在肅皇帝臨御之四十一載余同榜兄弟凡三百人
其定交於未第之先相契以心相期以道合并則喜離
索則憂至於事變屢遷休戚相念白首而不渝者則劍
江李孟誠洪都萬曰忠與余不肖蓋三人焉孟誠高明
以斯道自肩有泰山喬岳之氣象曰忠沉毅雖遯世不
悔有秋空野鶴之丰姿並余所敬事而余又虛衷好善
追隨二兄庶幾若水之能下渾忘彼我形迹則二兄亦

非余莫友也孟誠齒差長曰忠少孟誠一歲余少曰忠
五歲今俱老矣孟誠於是七十稱古稀矣孟誠當六十
時以滇南軍功遭讒毀被逮下獄者五年中外搢紳及
滇人粵人鳴冤之疏凡數十上會同榜王元馭少師方
晉首揆密為營救幸聖明一旦悟而釋之猶戍瘴海六
年於茲其門下士吳生自誠寤生祖光翟生繩祖柯生
紹臯輩憐其師之老而困處也偕來留都乞余言為壽
余惟人生宇宙間如駟駒過隙光百年瞬息耳何脩何

短何得何失何樂何憂以吾黨平生耳目之所覩記翻
雲覆雨千態萬狀真不啻夢幻泡影然亦何足介於達
人之胸次也雖然古之聖哲奮乎千百世之上而垂範
於千百世之下精爽恒存不可磨滅非以形骸之內計
得喪而定趨舍甚明而又非若異學者流等天地於浮
漚置萬緣於度外者比故上悲天命下憫人窮汲汲皇
皇一息不容少懈其中誠有所不得已焉耳余與孟誠
曰忠共抱此志而孟誠提揭修身為本一語以示學的

其旨甚微當在軍旅倥傯之際患難顛沛之鄉無日不與二子講於修身為本之學余頃歲與孟誠一晤於都門之羨里再晤於三山之禪舍見其處幽而不怨遠戍而能安萬里之外儼天威於咫尺而離家十年不敢一步越戍所顧恤其私海濱寥落百事荒涼而處之怡然若將終身其有闡道之語酬應之文明快春容其神益王此非致命遂志無入而不自得者不能修身為本之學斯其實體明驗也朝紳諸君子推孟誠有應變才

可當邊閩之寄以滇粵兩地所著軍功徵之信然然孟誠於今為國之老臣其學術在於正己正物弼主德而匡民生非偏才專於軍旅而已古有拔行伍起耕釣而授之將相之任者廣廈匪隆棟弗勝洪濤匪巨艦弗涉艱危匪大人弗濟安知孟誠不終遇於當今之世哉余因與二三子遙拜而祝曰願先生旦夕離瘴海大展經綸以報荅明主之恩以慰天下蒼生之仰又再拜而祝曰願先生即修身為本之學獨詣淵微盡忘言說而與

古聖賢精爽並存於天壤之間是余三人者終始相期之志二三子或未能盡知也

段幻然六十序

高攀龍

於今之世求天下奇才者吾必曰段幻然公何以言之曰公之才有本者也其寂也澗泓無朕時出也變化無方控御六合鞭笞四夷無所施而不可蓋公自見其一斑矣初令常熟常熟幸安無事公以廉平治之無所見奇無何以憂去服闋令輝縣是時河臣方治決河令各

郡縣供埽以萬計所費金不貲民方飢不堪當事督之
急公漫不應久之至檄令對簿公挾一二蒼頭囊百金
去決河所治埽不旬日具入見曰如令具埽當事者怪
曰何神也公為言埽編柳束土且幸被檄來辦河上省
道里費十九又督供椿木公曰木非地產陸輸費百倍
木以市便輸以水便自此至某所達河鑿所不達者較
各郡縣輸木費不及十三當事者大喜曰以此借筋天
下可矣縣祿逋賦山積至某年大熟未穫公以征科


不及格當降級輝民恐失公貸米商金輸官約以償米時石減金一銖公聞召父老謂曰父老苦惡歲久矣幸有年奈何以賦故石損銖金逐米商境外令民至冬勿易金盡輸米蓋輝米旁郡縣所仰給也公曰當路令旁郡縣仰給輝米者以金及脚直來輝代為輸省傍郡縣得輕齎輝得厚直民以大懼輝盜數公廉得其大首不誅令舉所部盜所部盜亦不誅令遞舉所部盡得輝盜籍之官分攝各鄉盜輝無敢為盜者他縣有貴客出其

途盜掠之當路捕盜急公召問諸盜一人曰必某某也
公曰何以知之盜出小冊袖中指曰某近某地某日某
夜不歸必為盜也立捕得盜歸貴客索其縣有訟數年
無能判者直指使以公神明檄公鞠勒七日報其案盈
牘公曰七日不能竟案奈何竟獄第取初牘繹之曰易
耳令吏數十輩分伏郵舍中人給紙筆筆因語公訊獄
未服令人稱使者至當迎公攜囚至郵亭再訊未服復
稱使者至公出迓兩造公桔置庭草中不相望見高戶閱

如也其被罪者人人號冤未被罪者相語曰固知事久必敗今果然矣舍中吏人人筆囚語公歸啟之囚立服蓋民有鬪者暗中推殺兄誣鬪者殺其兄也果七日報獄公間出其竒如此及入諫垣公一切持要以人才為先釋其狼狽不肖者惴惴白簡之將及己共起中公大臣調羣情不念國家治亂而公不容於世公於書無所不讀尤好釋氏人謂公豪傑奈何好釋氏余曰不然若以釋氏別有道即此道也道者人人本色人人自迷之釋

氏曲醒之即吾聖人亦然公第為釋氏竒耳公蓋入不
二之門具不測之用吾故曰公之才有本者也豈世之
馳騁浮氣漫當事者邪昔者徐文貞當國松坡畢公在
言路舉朝嚴畢公甚於文貞議且出畢公於外文貞曰
諸公畏之耶皆踧踏曰豈謂畏之黃門切直慮其府禍
耳文貞曰不然吾亦畏之顧念人孰無私私必害公有
若人在不敢自縱可寡過也聞者歎服嗟乎安得文貞
與之言幻然公哉宜乎有公之竒才當國家之急而不

收纖芥之用也今年公六十吾邑孝廉蔣君介如公所
識拔士以一觴觴公徵侑言於某某何以壽公第謂公
曰人之精神至寶也用之則輝煌宇宙不用則退藏於
密在宇宙則壽天下藏於密則自壽公其自壽以壽天



明文海卷三百二十

欽定四庫全書

集部

明文海卷三百二十一

詳校官編修臣潘庭筠

主事銜臣徐以坤覆勘

總校官庶吉士臣倉聖脉

校對官中書臣王家賓

謄錄監生臣朱學濂

欽定四庫全書

明文海卷三百二十一

餘姚黃宗義編

序一百十二

壽序

繆仲淳六十序 高攀龍

余年二十五而友於丁子長孺一日長孺謂予曰今海
內有奇士繆仲淳者子知之乎余曰未也曰其人孝於
親信於朋友塵芥視利丘山視義苟義所在即水火鷙

赴之余歎曰世有斯人乎越三年忽遇於內弟王興甫
所歡相持曰此為仲淳矣當是時興甫得異疾勺水不
下噎諸醫望而走一息未絕耳仲淳為去其胸膈中滯
如鐵石如拳者二興甫立起肅衣冠陳酒散拜仲淳余
驚曰聞君高義不聞君良於醫如是仲淳笑曰吾少也
病而習之頗得古人微處語世人世人不解也是日與
仲淳酒間談說古今事絕不及醫仲淳無所不妙解而
後益信長孺言知仲淳果天下奇士也又三年余以使

事至家得仲兒日抱弄之兒忽得異疾殆矣一日夜半
余夫婦淚簌簌相語曰是兒非仲淳不活顧安所旦夕
得仲淳坐而且門者報長孺至余妄念曰得無仲淳偕
來乎倒屣出見長孺果偕仲淳來果一藥而活是後余
婦余長兒余壻余孫遞遘危疾皆以仲淳活於是余邑
中不能知仲淳能知仲淳醫每仲淳過余容武相接也
余不厭晉接仲淳不厭聒人以方寸紙授方治之無弗
活而一時同志家所活無不如余家者今天子明聖輔

政皆出東南士以為千古奇會率獻其所學於廷冀吾
君於堯舜吾相於臯夔皆以迂不入後先落職歸而東
南士與西北異士歸田間甘泉香稻皆有以自樂可以
誦詩讀書養心繕性無富貴之慕然不能無疾病之苦
兒女之憂得仲淳并免於二者余常手額祝曰天生仲
淳為吾輩也仲淳又精形家凡山川隱見向背察之微
茫渺忽無失又能詩能大字熟於古今治亂邪正消長
之機熟於兩兵相臨勝敗之莫吾嘗謂仲淳立廟堂為

一官之長未能或之先即佐邊陲隱然長城也顧不與
一第天必有所用之誠得深山大谷二三同心聚書萬
卷蠹魚其中相樂以老仲淳必有千秋之業而又不可
得天之所以用之者豈僅如吾前所云者而止耶

奉壽外舅念東翁六十序

歸子慕

事有不可知而以得之為幸故其喜也亟事有所可知
而以得之為常故其樂也長吾鄉之先達屈指稱高年
者必曰金氏東濱公蓋東濱公年幾百歲云而吾舅念

東翁即東濱公之仲子也今年六十矣方東濱公之七十也先子太僕實為之文追論二十年前寓京師時公為中城兵馬指揮一時同邑諸公登朝者數人其貴顯者多矣而二十年間惟公無恙餘無一人在者於是深有感於衰榮顯晦之際與夫人世光景之迫蹙不勝咨嗟歎息以七十為古之稀年人所深願而不可必得者惟公得之而安知其後公之年殆得百歲邪豈惟東濱公而東濱公之夫人今者亦年踰九十神氣精爽行且

度百歲而過之先子又安知東濱公之夫人行過百歲
邪事有不可知則先子以東濱公七十歲為人世之稀
有事有所可知則子慕方以念東翁百歲為金氏之恒
事然則今之六十其猶在少壯之年未可以賀也其喜
也亟故亟稱之先子之於東濱也其樂也長故樂道之
子慕之於翁也當東濱公之七十與先子執筆為文之
時子慕之生甫踰年先子亦安知其季子後為公家壻
亦安知東濱公之仲子即吾季子之婦翁後三十年復

執筆為文而為其婦翁壽此其事之不可知者也不可
知彼一時也所可知此一時也百歲之壽葬於金氏之
門上下三十年歸氏之文再揭於金氏之堂吾子奉世
今能負薪矣其母不幸早世賴天之靈得存此孤也以
能無失詩書之澤後三十年子慕將為七十歲人今是
子以外孫復執筆為文為其外祖壽斯不亦人事之奇
太平之一瑞乎子慕不文不敢自附於先子而其事則
有相符會者聊書其概以為左券云

明文海卷三百二十一

欽定四庫全書

明文海卷三百二十二

餘姚黃宗羲編

序一百十三

哀輓

葉宗茂哀詩序

朱升

新安葉宗茂有清才年近四十有四卒於金陵即見聞者哀其遭時之不偶也為之賦詩而呈之老交朱升為之序序曰宗茂葉漁翁之子生二歲移家於蓼自其幼

以敏給聞稍長治進士業從余復卿先生學戴氏記歲
丁亥歸就鄉藉試有司明年予歸自燕山取道至蓼訪
之後五年淮兵起宗茂避地歸鄉兵旋至郡邑宗茂從
鄉兵奮禦稱能後四年江南開省或薦之起家知婺源
州時州境未定非美官也既而鎮戍官適前從統鄉兵
者於是上下相安得行撫字之政再考乃代代者不善
於民宗茂美聲益遠播矣使說蜀說所長也既而不遣
使督造戰船事集使守饒饒境接婺源民歡其至戍將

與之不協不久罷去謫濡須一年讀書治藝不戚戚或
又摘其所督造船不善重得譴去年使築城所賦尋仍
十倍其家產不給也子仁效緹縈上書得免今年夏以
病終嗚呼宗茂而止於斯邪宗茂風神秀徹言笑媚好
讀書史不數過成誦為人比方解說無不喻者隆師親
交好賓客急人貧難有國士風作詩有思致有所論述
滔滔不厭倦一時欲有為於世者徃徃以器略待之然
而天性率直不能曲為謙退推讓以苟悅人視己之善

如人之善視人不善如己不善非古心古道之士不能
不相齟齬宗茂之得譽毀以此楊子雲曰世亂則賢聖
馳騫而不足世治則庸夫高枕而有餘亂世之民困於
供億仕則困於責任不能集事者得罪而禍亟集事則
事愈歸之甲兵錢穀撫綏應對豈一人身所備一不美
卒不得免焉使宗茂之涉世也得三四十而不亂卒其
經業名進士也展其事業良有司也又加以年壽歛
華而實為賢公卿鄉先生以善後來衰老者得所倚賴

豈不甚善而乃止於此豈特其一身一家之氣運邪始宗茂從余遊與婺源俞仲謙偕二人通家昆弟出處必相從仲謙能以義相正若不相能也宗茂既卒平生所與善相附者衆而能存念其孤永其身後名者仲謙一人余故雖以宗茂能得友古心古道未始絕無人自慰而重念人間世之可悲也嗚呼宗茂則已矣吾與仲謙之悲何時而已耶

太保白公輓詩序

吳溥

輓詩何自而起乎說者謂吳伐齊公孫夏將戰命其徒
歌虞殯此始也以予觀之夏之志在敵愾故令人先為
是歌示若送死然非所以為挽也或云田橫死門人畏
漢不敢哭乃作萬里薤露之歌其說近是然亦不能無
疑焉橫之歸漢惟二客從橫既死二客皆自刎是可謂
慷慨以殺身者敢死而不敢哭乎使誠畏漢則歌與哭
何異意者漢吏感橫之義隨柩叙哀後世相承為挽歌
耳是則凡所以挽之者皆傷之也非擯棄流落窮困無

聊之人則無以發哀痛慘戚之詞若夫公卿大夫道行
志得亦何用挽為哉余於是蓋有說焉道雖行矣而或
未究其用志雖得矣而或未竟其施天下之人聞而傷
之挽之可也又其上者功業塞天地德澤被民生後世
思其人而不可見雖由今挽古亦可也吾郡白康敏公
自給舍十一遷而至宮保其所建白於上而敷布於下
者不可勝計天下陰受其賜人惡得而知之至於慮因
省刑降寇賑飢殺河流通餉道其功赫然在人耳目有

不可泯百世之下人猶思之而况今日之熟於見聞者乎詩自魏公徐公而下凡若干非傷之也思公而不見不待百年而作者也

桂紀善輓詩序

陳敬宗

禍福之至有莫知其所以然而然者則皆委之於命命懸於天而福善禍淫之報天實司之君子之為善也蒙其福矣而或罹於禍小人之為惡也罹其禍矣而或蒙其福揆之於理而冥冥質之於人而漠漠訴之於天而

若不聞至於無可奈何則相委之曰君子為善而得禍
小人為惡而得福皆其人之命不然則胸中不平之氣
無自伸而怨天尤人之恨相尋於無窮矣是豈君子修
身俟命之道哉紀善桂公宗生晉王右傳彥良先生仲
子洪武中以明經薦達授知陝州其年逮事州之民詣
闕訴而薦之陞平陽知府未幾復以事謫戍遼東時朝
廷大舉禮文之事於是尚書呂公舉公文學薦入內廷
與修永樂大典書成而授今職復幾年獲重譴謫為交

州吏胥公挈其家以往既而不幸俱死於役可勝痛哉
公坦坦施施自家而達於為官自少壯而至於老未嘗
有疾言遽色忤於人其居官廉公而能斷其臨民則慈
父母之愛其子也其稱人則務辨去其惡而曲舉其善
其賑窮恤乏雖輟朝暮之飧與之不靳也居顯職不為
躍躍之喜罹大難不為戚戚之憂為文與詩雖不甚求
工於賓友觴酌之際諷誦雋永不啻吹竹彈絲敲金而
擊石也公盛德士也宜益大以顯矣夫誰使其至於此

極哉不幸一身至於是矣而及於其子若孫其理安在
孟子曰君子之澤五世而斬桂自先世至於右傳以及
於公其澤當益衍而未罄也豈天降割於其子若孫而
延施厥禍於其躬邪不然則宜委之於命而不必求其
所以然也公既卒訃聞於中外遠近親友之間無不相
聚哭之曰桂公善士也其得禍如此使為善者何所勸
哉於是相與作為哀輓之詩以悼其不幸凡得若干首
其姪子善聯為大軸請予讀而序之嗚呼三良歿而黃

鳥之音傳田橫死而蒿里薤露之聲作觀諸縉紳所以悼公之不幸者事雖不同其痛鬱淒惻之情視昔有加焉予讀之不自知其涕之無從也遂書以為序

澹齋先生輓詩序

陳獻章

昔人求哀辭於林舉舉謝之書有曰君子無苟於人患其非情也夫感而哀之所謂情也情之發而為辭辭之所不能已者凡以其哀為之也苟無其哀矣則又惡以辭為哉此之謂不苟於人也余頃居京師二年間從貴

公御游入其室見新故卷冊滿案其端皆書謁者之辭就而閱之則皆親戚故舊之求哀辭者而其辭率大同而小異凡以其親故求挽詩者十恒八九而莫不與也一或拒之則艷然矣懼其艷然而且為怨也而強與之豈情也哉噫習俗之移人一至於此亦可歎也天下之偽其自茲可憂矣澹齋先生姓某氏名某林坡黎先生門人也吾鄉稱先達以文行教後進百餘年間黎林坡一人而已林坡與予連里第余之生也後不及侍其門

弱冠與澹齋之子益遊始拜澹齋誨余以林坡事行縷縷此豈一日忘其師者邪當是時林坡之門存者不少獨澹齋以其學教授於羅山之下子弟有所矜式焉夫不背其師於既死而傳其學於來世信也愛其子以及其友仁也益之子執饋於我雲也今為梁氏甥戚也藉是三者其死也能無哀乎哀而後為之詩詩之發率情為之是亦不可苟也已不可偽也已

陳重器輓詩序

莊景承

予歲之己卯舉進士春官與今刑部郎中長沙陳君宗器會於白下舟中時其父封君其兄公器在焉封君則古光蒼勁公器則精敏浩博而宗器則又豪俊英爽可敬可畏自是與宗器聯翩北上相與日親乃得宗器家世之詳宗器謂其兄弟七人皆有可觀其兄重器尤不置口且曰於公器不減而自謙其不能過余遂識之於心亟欲見之不可得也丙戌余與宗器同登甲科其後北轅南楫奔走四方與之不相見者十年每見傳記所

載如高辛氏之八子周之八士荀氏八龍馬氏五常眉山三蘓者未嘗不思念陳氏父子兄弟也前年夏宗器與廉州守劉君用光偶自公暇過江訪予定山握手道故舊懽甚竟一日夜乃去宗器將行出一帙示余曰此吾亡兄重器挽詩也敢請一言以序諸首余曰此豈余欲見之而不可得者哉宗器遂歛歔不自已余亦不能不為重器悲也予不識重器奚為而悲世之賢者常少不賢者常不能無賢者人之眼目國之著龜世道賴之

以立人紀賴之以正君子有所恃而不怠小人有所畏而不為不賢者常至貴壽賢者常至夭死如往年吾友羅一峰者亦可悲矣重器果如宗器之所稱論亦不可謂之不賢者余於重器何為而不悲哉重器挽詩皆今天下士大夫所為哀者宗器以為今士大夫皆文章俊傑之士而予山人文章之人文彩絢爛而山人之言野朴絢爛之言美浮於實而野朴者後將可信而傳也嗟乎此吾宗器之慮之過也周公孔子顏回孟軻其死也

孰誅孰銘孰傳孰序天下後世稱為大聖人大賢人者
亘萬古不衰名之傳與不傳者人之賢與不賢也使重
器果賢也人將傳之不遑暇食使其不賢雖百予山人
亦豈能有所傳哉矧夫至人無行至德無名以鴻濛渾
噩於太古之天者又不係於傳與不傳而奚俟乎汲汲
於是宗器曰固已諸士大夫之意其可幸哉余不能絕
遂筆其言於尾簡以為重器挽詩序

羅濬淵父母輓詞詩序

羅倫

哀死而歌之禮乎古未有也禮也哭日不歌望柩不歌
適墓不歌隣有喪春不相里有殯不卷歌歌以樂也斥
苦以歌虞殯以歌蒿里薤露以歌歌以哀也歌之始也
歌以樂哀非禮也歌以寄哀禮也古未有也哀死者人
之情也凡血氣屬莫不有知有知則知哀其類鳥獸之
類喪也回翔鳴號躑躅踟躕而後去情也情於人也至
矣父子哀之兄弟哀之妻妾哀之鄰里鄉黨哀之無他
情之至也楚人死秦人則不哀之越人死燕人則不哀

之無它情之不至也故曰知死者傷後世挽歌焉秦楚
燕越之相哀也斯禮也仁矣子曰吾求也為吾親人曰
吾應人求也為人之親天下其孰解之誠為親乎有道
焉舜為親焉重華禹為親焉祗承孔子為親焉學周公
孟子為親焉學孔子三聖一賢其為親也求諸內而已
矣今日為親忘其內而後乎外何也噫弊也久矣上舍
濬淵甫倫同姓家萬安其父母卒有歌而哀之者謁余
序余不能止也解其言

任處士輓詩序

張弼

夫輓詩昉於虞殯紼謳薤露萬里之作蓋引紼昇柩謳歌以相哀也然不載於禮經者以其彌文而非哭踊之際所宜辨也近世之輓詩則又不然頗類黃鳥之哀三良耳若唐人之悼亡哭友亦多矣然皆出於人之本情非人子所預也今之俗歿其親者率欲多得輓詩為事有纒然衰絰走人之門者甚至恐觸人諱冒吉服都騎從而往者於情何堪於禮何居於事何益哉然又有可觀

者或既祥禫或越數載不忍死其親沒其善其以輓詩
為事則厚之道也而非之者又當有擇若生為人所敬
愛死為人所悼念則哀之若生為人所畏惡死而人慶
幸之則何哀之有是亦天理人心之公又君子翼善遏
惡之機也可輕徇人乎哉若天台任處士守仁素履為
鄉邦重久矣弗占一命而卒是可哀也今墓木且拱其
子純一懼其善之弗彰汲汲祈諸作者於禮無拂於孝
有加於俗不苟誠可與也已故序諸首且以解人子之

惑於俗者

鄭處士輓詩冊序 李承芳

承芳少不好多學文辭既長又為貧所累凡所記誦率遺忘半之且汨汨於仕途而聰日益損矣凡時之所需詩文實不能應之也聞者山東僉事王公經乃大司馬陝西王公公度之子也命作司馬輓詩序予固不辭為茲同年進士鄭君協使作鄭處士輓詩序予亦不辭之也處士名 闕字 闕於協為叔父實江西吳康齋先生

門人也予雖未識處士聞處士在康齋門稱為高弟則
其所得果何如者哉夫自南宋以來士大夫習於章句
之學而於古者聖賢之道與凡經書之旨惟屑屑於文
字箋注指其言曰古之道在是也已至論從祀孔廟亦
惟以此為衡謂之羽翼六經嗚呼以聖賢一言各累為
數十百言愈多則愈晦愈雜則愈病害聖賢之道莫此
為甚而反以為功何哉康齋者其於聖賢經書不加一
字於其間焉毅然屹立不由於科目之途所謂聖人之

徒詎非斯人邪嗚呼古之君子者易為功今之君子者
難為力何者漢之三五儒者如董仲舒輩去古未遠而
於經書收補其殘缺而已至於出處尚可以正道也唐
之韓愈其功在於正佛老夫顯異於先王先師者人皆
知其為兩途一人倡而正之人皆易知而易從也故曰
易為功也及今百數十年來進身者惟以科目而科目
以經書為先文字以傳註為主揚而稱之曰古聖賢之
道在經書經書之明在傳註文字之作本傳註謂之道

在於茲豈不似是也哉於此有人焉欲會其破裂而歸於全止其百孔千瘡而復其本體且於沉溺漸漬之餘驟起而鳴之况時既遠於仲舒位不逮於退之其誰不以為非邪昔以異而辯其異今於同而欲正其異祛其異而返諸同較之豈不百倍其難矣哉處士之學與其出處是可與也已予恨所生之晚未得及康齋之門惜處士不壽未得相輔而有成也豈非文之厄歟自古君子之於道達則行之窮則明之王公公度其行庶幾鄭

君處士其明庶幾此挽詩之序余所以兩作之也

西坡翁輓詩序

黃綰

輓詩之作非古乎死生一往來也往來一晝夜也晝夜之變寒暑于焉推移古今于焉代謝蓋即其變者而觀之乃有不變者在即其不變者而觀之乃無時而不變則天地猶一人古今亦一日長於萬古不知所以長短於旦夕不知所以短庸知生為可樂死為可哀耶古之聖人有見於此以達幽明之故故通晝夜而知所以樂

天知命安土敦仁獨立與天地參也况為歌詩出非其情無益損而為之悲戚哉夫然則知三良之哀田橫之弔皆非至數今西坡翁生能葆真歿能有傳雖無赫奕驚世惡知噏歛之間不有靈明獨照往來而不息者哉亦何事怛化以為之累吾是知挽詩之作非古今累憤於西坡翁也何有

養氣俞先生輓卷序

羅紀

有令於人曰而父邪而祖邪其生也吾辱之其死也吾

毀之雖不必辱與毀也而已讎之矣改而曰其生也吾
任之其死也吾誅之雖不必任與誅也而已德之矣夫
人之情一也亦豈好讎而惡德哉誅之興也有由矣酪
漿醞於家而爭市者悅其甘也烏頭鬻於門而卒不售
者惡其毒也人亦難乎立言者也抱鵠夷而號於門牢
關而拒之善主酤者不為也勺洩以紹之斯甚矣執牘
而號於門牢關而拒之善立言者不為也包藏以譏之
斯甚矣孟子曰仲尼不為己甚誅之多諛也有由矣東

隣之寡母有司請於上而旌其門西隣之孀婦立其子而詈之天下之不詈其子者寡矣而欲子之不為誅也難矣是故百斛之粟農夫之富也百鎰之金蓄賈之富也金石之文世家之富也居今之世而欲不貴於是也吾未見其能也養氣俞先生信豐人既歿之三年人之誄先生者至成卷帙其孫洲計偕來也實挾以行予素善溥溥來丐余序予亦序所以作者之意與時之好尚云爾蓋有感也然溥通三傳有氣概終當一鳴於時先

生其附溥以有知此溥之事也予言其足恃也哉

曾孝義輓章引

羅玘

曾孝義先生既歿歿幾四十年士大夫作為歌詩且盈卷帙又得少宗伯徐公追銘之於乎是何其悔於初而耀於今乎於乎死如有知寧不展顏於九原如無知乎亦因以托於不朽不猶愈於不齒於人而泯泯無聞者乎彼萬乘之君千金之子其在當世威權貨利求則得之快心適意曾何遑恤至於乖禮離義固無足怪訝然

亦自畏其名之靡臧也。一旦不諱，猶為無爵者之幸。不幸有爵，爵高而惡彌著。孝子慈孫，雖欲掩蓋粉飾於百世之下，末由也已。抑有安稔厥惡，用沉其先聲之美黠。黠寂寥下伍，閭左雖有周孔之賢，亦何益矣。是二者均也。要之吾獨以為後之說勝。不然，先生雖孝且義於人，蓋途人也。途人則生不慶，死不弔。而况後三、四十年，忽爾而崛起乎？曰：為其孫作之也。孫為誰？名英，字世傑，恢然長者也。今丞江都人，皆樂從其請云。

鄒氏雙挽詩序

羅玘

雙挽詩一卷挽崇仁裕菴處士鄒用明附以王孺人故
題曰雙挽云處士之子上舍懌持來示余余考其歲月
成化十四年處士歿更十一年是為弘治元年孺人歿
處士之歿於今十有八年孺人之歿於今為八年而詩
又皆今之士大夫為之且非崇仁人也即崇仁當時哭
其喪而臨於壙者今且零落凋謝將十五於其間其存
者未必能能者未必崛然興思而為之詩也又况距崇

仁數千里之京師哉古人以喜不慶憂不弔為塗人塗人云者或面而不相名或名而不相知皆可以為塗人而非若此之相越且疏也以過於途人之疏而為痛哭悲哀之言其為不情也亦甚矣而亦何貴哉予因謂懔曰宜毀此懔泣曰毀良是然而不毀亦有道也驥之行也一日而千里青蠅附於其尾亦一日而千里不然尋丈間營營一物而已矣今吾附吾親於是安知不有驥也邪吾為親佞也不知其他予恍然思其言甚質為之

書其事

藥菴陳先生輓冊序

夏良勝

輓歌作於古也有二義斥苦虞殯挽車者以相力也薤
露蒿里挽首者以禁哭而寓哀也今之作者固非有不
得哭亦未必執紼人也若古義何良勝嘗思易此義而
未敢也因讀藥菴輓冊竊有發焉夫車行而挹之曰輓
是去而欲留之義人死而輓之顧非欲其不死也哉不
死之道四爵祿不與焉教足以立師政足以飭吏仁足

以御家義足以益友有其一亦不死也槩菴其兼之矣
初以鄉進士署浦城學事曰豫曰時曰孫曰摩共乃職
士樂以有成其教以立師者歟才識稱上檄以董邑治
因革惟宜厥庶胥懷以畏其政以飭吏者歟大病而途
歿知者咸慟之視歛臨棺慰其孤者如織操筆作誄凡
數十家其仁以御家而義以益友者歟夫義也仁也政
也教也皆不死也惜乎爵不滿若能祿不克若志使仁
義之行者未究而政教之施不逮也此所以輓槩菴於

不死也若無所行能而徒久於人世則固死之矣死而
輓之何為哉然則古之輓者其義二今之輓者其義一
古之義也疏以隘今之義也遽以通固有自我作古者
豈必昉古而後作歟槩菴姓陳名義字以方閩之莆田
人

涉封君輓詩序 邊貢

序曰輓詩也者古虞殯之歌也後之人感祖焉其變也
如誄又如懷古之詩其甚也如咏物之詩斯極矣今之

輓詩是咏物之詩之流也夫人之生也而吾交焉死也而吾見焉而歌以殯之夫是以其音也哀而其言有情也故如誄焉未交其生也未見其死也而其人美焉過於其里而弔諸其墓賦焉讀之者可以觀聞之者可以興也則懷古之詩也其生也未交也其死也未見也未過其里未弔其墓也美惡朦焉徒據其需之者之文而賦之其言弗情也其音弗哀也其讀之者弗可觀其聞之者弗可興也嗟乎其詠物而已矣今之為輓詩者之

類焉故曰是詠物之詩之流也是故虞殯之歌之不傳也久矣其變也亦極矣不得已而思其次焉誄可也又其次焉則懷古亦可也廣陵涉仲翁氏嘗以其子之貴封監察御史又以其子為按察副使也嘗就養遊於梁梁之為宣政為提刑為軍帥為學士大夫者咸見焉當是時翁之年已七十有八矣久而思其鄉乃歸歸一年而卒凡梁之見翁者咸賦焉畀其子歌以殯翁其言情其音哀也君子曰為此詩者其幾於古乎夫見其生也

則不必見其死交於子也則不必交於父且其事母之
孝事兄之弟教子之誼居鄉之仁見於命辭者四美昭
焉與需之者異也可無興乎固逾於過其里而弔諸其
墓者矣

粵老高翁挽歌冊序

吳時來

挽歌何起生者於死者無以致其哀悼惻怛之情又戒
不瞑故為之詞以緩死者欲令知化則薤露蒿里之篇
是也死者自無以致其哀悼惻怛之情臨化自為挽歌

以自緩以明安化則擬輓歌諸篇是也是故挽者緩也
是則自挽歌肇陶處士生者挽死者本田橫諸客則皆
其情有繫心有寄未有與其人之耳目不相接素無彈
劍杯酒之歡無因而起者然則可乎按禮有之生之死
之丈夫既因生者而弔其死者而可然則因生者而挽
其死者抑又何疑茲挽歌冊橫鄉士大夫為廣州粵老
高翁作也橫鄉士大夫於翁未有耳目之接及素有彈
劍杯酒之歡也而其感若深於耳目之接與夫素有彈

劍杯酒之歡翁令子士楠守橫州有善政民悅以懷則
莫不願粵老翁日壽令太守得以久於橫今太守之奔
翁故之以也則莫不戚戚謂不憇遺之老乃奪守以去
也民有情不能歌述民之情而歌鄉士大夫事也茲歌
挽冊所由成也乃二陸大夫舜臣湯臣侯大尹嘉祐陳
文學三謨謁序於遷人來來曰臨官不敬非孝也若太
守彼所謂敬以成孝者非邪用能迨諸其先君子有殺
貽孫子若粵老其有殺者非邪用能貽諸其後按山海

經增城番禺之山樹可百尋卑枝之陰可千畝蓋所樹
彌高所庇彌博也太守歸其奉先人息駕於之山俾執
紼者一一歌之於是邦人來觀者可謂曰有子

貳守王公輓詩序

楊麒


世之為哀誄之辭者或哀其勲業之弗終也福澤之弗
裕也若憶情素於交承感聚散於存歿也數者不同均
為識其哀而已就中亦無可論者乎夫物不可窮而分
各有定於是乎勲業福澤有弗齊之患君子不自悲也

程子有言天下之事譬之一家非我為則彼為非甲為則乙為君子公天下以為心要之固有不必出於吾身而後為之功者猶之一家之中弟克幹蠱則兄偕用譽之休父能閑家則子安富順之吉天下之事何莫不然乃若君子之責成於己也常厚其責報於天下也常薄故凡俛焉孳孳以砥礪於終身者求不歟於其仁而已心苟無瑕則稿蓬蒿死溝壑可也而遑恤其他乎故曰勲業福澤之不齊君子不自悲也以君子不知自悲者

取而為之悲用心亦過厚矣乃若憶情素感存沒則固
其情之不容已者乎予觀貳守王公輓詩之帙而見吾
鄉薦紳君子用心之過厚也由前所言數者其備之矣
無乃感之深而發之厚乎予固知王公所自悲者不在
彼而吾人所不容已者其在此也公嘗典教宰邑守州
倅郡所至治教洽而德施宏固非闇潛光於未試者藉
聲華之舊而有箕裘之子其美可衍於無疆則所以不
自悲者尤不足悲者矣惟夫吾人所不容已者之發於

中則淒風衰草足以動幽思花樹棠陰足以感遺愛而
况盼靈輶之遠逝想舊德於永睽其情能已乎斯情也
固人心感通之幾愛之萌也惻隱之發也無此則流於
忍而非所以為人矣意茲今者輓詩之作其得已而不
已者乎雖然王公固亦有以致之矣夫人之常情敬且
悅則思之思則誦之而發於咨嗟咏歎之不能諛順則
服而逆則讎從古所畏費詞妄說知禮者恥之因詩以
寓情誠有不容以強焉者予於此而益以見王公德政

之良也人心是非之公也可以勸且躍矣予固沐公之
休而難為情者因序其事以識予之哀云



明文海卷三百二十二